

დამტკიცებულია
აჭარის ავტონომიური რესპუბლიკის
უმაღლესი საბჭოს ბიუროს 2018 წლის 4 ოქტომბრის
№79 გადაწყვეტილებით

ბიუროს სხდომის თავმჯდომარე
 დავით გაბაძე

**საზოგადოებრივი მაუწყებლის აჭარის ტელევიზისა და რადიოს
მრჩეველთა საბჭოს წევრობის - მრჩევლობის კანდიდატის
შესარჩევი საკონკურსო კომისიის**

დ ე ბ უ ლ ე ბ ა

მუხლი 1. ზოგადი დებულებები

1. საზოგადოებრივი მაუწყებლის აჭარის ტელევიზისა და რადიოს მრჩეველთა საბჭოს წევრობის - მრჩევლობის კანდიდატთა შესარჩევი საკონკურსო კომისია (შემდგომ - კომისია) არის აჭარის ავტონომიური რესპუბლიკის უმაღლესი საბჭოს თავმჯდომარის განკარგულებით კანონმდებლობის შესაბამისად შექმნილი დროებითი ორგანო, რომლის ფუნქცია საზოგადოებრივი მაუწყებლის აჭარის ტელევიზისა და რადიოს მრჩეველთა საბჭოს წევრობის - მრჩევლობის კანდიდატთა (შემდგომ - კანდიდატი) შერჩევა.

2. კომისია თავის საქმიანობაში ხელმძღვანელობს „მაუწყებლობის შესახებ“ საქართველოს კანონით, აჭარის ავტონომიური რესპუბლიკის უმაღლესი საბჭოს რეგლამენტით, ამ დებულებითა და სხვა სამართლებრივი აქტებით.

3. კომისია შედგება 5 წევრისაგან.

4. კომისიის შექმნის წესი განისაზღვრება „მაუწყებლობის შესახებ“ საქართველოს კანონითა და აჭარის ავტონომიური რესპუბლიკის უმაღლესი საბჭოს რეგლამენტით.

5. კომისიის შექმნის მიზანია საზოგადოებრივი მაუწყებლის აჭარის ტელევიზისა და რადიოს მრჩევლის შერჩევის პროცესში მონაწილეობა.

6. კომისია თავის საქმიანობაში ეფუძნება კოლეგიალობის, გამჭვირვალობის, ობიექტურობისა და სამართლიანობის პრინციპებს.

მუხლი 2. კომისიის უფლებამოსილება

კომისია:

ა) ამ დებულებით ადგენს კანდიდატის შეფასების დამატებით კრიტერიუმებს;

ბ) კანდიდატს შეარჩევს კანდიდატურების სიის გამოქვეყნებიდან 15 კალენდარული დღის ვადაში, ორ ეტაპად. პირველ ეტაპზე კანდიდატი შეირჩევა „მაუწყებლობის შესახებ“ საქართველოს კანონით დადგენილი საკვალიფიკაციო მოთხოვნების შესაბამისად. კანდიდატის შეფასების დამატებითი კრიტერიუმები განისაზღვრება ამ დებულებით. მეორე ეტაპზე კანდიდატი შეირჩევა მის მიერ წარმოდგენილი საზოგადოებრივი მაუწყებლის აჭარის ტელევიზისა და რადიოს განვითარების კონცეფციის განხილვისა და გასაუბრების შედეგად. კანდიდატის შემდეგ კომისია უმაღლეს საბჭოს წარუდგენს ასარჩევზე სულ ცოტა სამჯერ მეტ კანდიდატურას;

გ) უზრუნველყოფს შერჩეულ კანდიდატთა მიერ საზოგადოებრივი მაუწყებლის აჭარის ტელევიზისა და რადიოს განვითარების კონცეფციების საჯარო განხილვას. ამასთანავე, კანდიდატი ვალდებულია კომისიას წარუდგინოს საზოგადოებრივი მაუწყებლის აჭარის ტელევიზისა და რადიოს განვითარების კონცეფცია, რომელიც საჯაროდ უნდა გამოქვეყნდეს და მონაწილეობა მიიღოს დებატებში, რომელიც გაიმართება მრჩეველთა საბჭოს წევრად – მრჩევლად არჩევამდე.

მუხლი 3. კომისიის საქმიანობის ორგანიზაციულ-ტექნიკური უზრუნველყოფა

1. აჭარის ავტონომიური რესპუბლიკის უმაღლესი საბჭოს აპარატი კომისიას უზრუნველყოფს სამუშაო პირობებითა და მატერიალურ-ტექნიკური ბაზით.

2. კომისიის საქმიანობას წარმართავს კომისიის თავმჯდომარე, ხოლო მისი არყოფნის შემთხვევაში – კომისიის მდივანი.

3. კომისიის თავმჯდომარე აირჩევა კომისიის შემადგენლობიდან, ღია კენჭისყრით. კომისიის თავმჯდომარის კანდიდატურის დასახელების უფლება აქვს კომისიის არანაკლებ 2 წევრს. კომისიის თავმჯდომარე არჩეულად ჩაითვლება, თუ იგი მიიღებს კომისიის სხდომაზე დამსწრე წევრთა ხმების უმრავლესობას.

4. კომისიის მდივანი აირჩევა კომისიის შემადგენლობიდან, ღია კენჭისყრით. კომისიის მდივნის კანდიდატურის დასახელების უფლება აქვს კომისიის თავმჯდომარეს. კომისიის მდივანი არჩეულად ჩაითვლება, თუ იგი კომისიის სხდომაზე მიიღებს დამსწრე წევრთა ხმების უმრავლესობას.

5. კომისიის თითოეულ წევრს აქვს ერთი ხმა.

6. კომისიის პირველი სხდომა ტარდება აჭარის ავტონომიური რესპუბლიკის უმაღლესი საბჭოს თავმჯდომარის მიერ კომისიის შექმნის შესახებ განკარგულების გამოცემიდან არაუგვიანეს 3 კალენდარული დღისა.

7. კომისიის სხდომა მოიწვევა კომისიის თავმჯდომარის გადაწყვეტილებით.

8. კომისიის თავმჯდომარე საკუთარი ინიციატივით ან/და კომისიის არანაკლებ 2 წევრის მოთხოვნით იწვევს კომისიის სხდომას.

9. კომისიის სხდომის მოწვევის შესახებ ინფორმაცია კომისიის წევრებს უნდა ეცნობოთ სხდომამდე, როგორც წესი არაუგვიანეს 24 საათისა.

10. კომისია უფლებამოსილია მიიღოს გადაწყვეტილება, თუ მის სხდომას ესწრება კომისიის არანაკლებ 3 წევრი.

11. გადაწყვეტილება მიიღება კომისიის სხდომაზე დამსწრე წევრთა უმრავლესობით, მაგრამ არანაკლებ სამისა.

12. კომისიის სხდომის ოქმი ფორმდება საქართველოს ზოგადი ადმინისტრაციული კოდექსის 106-ე მუხლის შესაბამისად.

13. კომისიის გადაწყვეტილებას ხელს აწერს კომისიის თავმჯდომარე და კომისიის მდივანი.

14. კომისიის სხდომები, როგორც წესი, ღიაა. სხდომა შეიძლება დაიხუროს კომისიის გადაწყვეტილებით.

მუხლი 4. კომისიის თავმჯდომარე და კომისიის მდივანი

1. კომისიის თავმჯდომარე:

ა) ხელმძღვანელობს კომისიის საქმიანობას;

ბ) იწვევს და წარმართავს კომისიის სხდომებს;

გ) კომისიას დასამტკიცებლად წარუდგენს სხდომის დღის წესრიგის პროექტს;

დ) უზრუნველყოფს კომისიის მიერ კანონმდებლობით გათვალისწინებული სხვა პროცედურების შესრულებას;

ე) წყვეტს სხვა საკითხებს, რომელთა გადაწყვეტაც საჭიროა კომისიის გამართული ფუნქციონირებისათვის და რომლებიც შეესაბამება კომისიის საქმიანობის მიზნებსა და ამოცანებს;

ვ) წარმოადგენს კომისიას მესამე პირებთან ურთიერთობაში;

ზ) ხელს აწერს კომისიის მიერ მიღებულ აქტებს.

2. კომისიის მდივანი:

ა) უზრუნველყოფს სხდომის მოწვევისა და ჩატარების ორგანიზაციულ საკითხებს;

ბ) კომისიის სხდომაში მონაწილეობის მიზნით იწვევს კანდიდატებს;

გ) უზრუნველყოფს კომისიის სხდომაზე გასამართი კენჭისყრის პროცედურების ჩატარებას;

დ) აფორმებს კომისიის სხდომის ოქმებს;

ე) ასრულებს კომისიის თავმჯდომარის სხვა მითითებებსა და დავალებებს.

მუხლი 5. კანდიდატისა და საზოგადოებრივი მაუწყებლის აჭარის ტელევიზიისა და რადიოს განვითარების კონცეფციის შეფასების კრიტერიუმები

1. პირველ ეტაპზე კანდიდატი შეფასდება „მაუწყებლობის შესახებ“ საქართველოს კანონით დადგენილი საკვალიფიკაციო მოთხოვნებისა და ამ დებულებით დადგენილი კრიტერიუმების საფუძველზე.

2. მეორე ეტაპზე მოხდება შერჩეულ კანდიდატებთან გასაუბრება და შეფასდება მათ მიერ წარმოდგენილი საზოგადოებრივი მაუწყებლის აჭარის ტელევიზიისა და რადიოს კონცეფციები.

3. კომისიის შეფასების დამატებითი კრიტერიუმია:

ა) საზოგადოებრივი მაუწყებლის აჭარის ტელევიზიისა და რადიოს კონცეფციისათვის:

ა.ა) კანდიდატის მიერ წარმოდგენილი საზოგადოებრივი მაუწყებლის განვითარების კონცეფციის შესაბამისობა მაუწყებლობის შესახებ საქართველოს კანონმდებლობასთან;

ა.ბ) საზოგადოებრივი მაუწყებლის აჭარის ტელევიზიისა და რადიოს განვითარების სამომავლო ხედვა;

ა.გ) საზოგადოებრივ მაუწყებელთან ურთიერთობის განვითარების სამომავლო ხედვა.

ბ) კანდიდატთან გასაუბრებისას:

ბ.ა) საკუთარი მოსაზრებების დასაბუთების უნარი;

ბ.ბ) პროფესიონალიზმი;

ბ.გ) კომუნიკაციურობა;

ბ.დ) სიახლეების დანერგვის მისწრაფება.

მუხლი 6. კანდიდატის შეფასების წესი

1. კანდიდატებისათვის ხმის მიცემა ხდება ფარული კენჭისყრით.

2. კომისიის წევრები აჭარის ავტონომიური რესპუბლიკის უმაღლეს საბჭოს წარუდგენენ შერჩეულ კანდიდატებს მიღებული ხმების მიხედვით, ყველაზე მეტის რიგითობის წესით. ერთნაირი რაოდენობის ხმების მიღების შემთხვევაში კანდიდატების სია შედგება ანბანური თანმიმდევრობით.

მუხლი 7. დასკვნითი დებულებანი

1. კანდიდატის შერჩევის პროცედურის დასრულების შემდეგ კომისია ასრულებს საქმიანობას.

2. კომისიის მიერ საქმიანობის დასრულების შემდეგ კომისიის ამსახველი დოკუმენტაცია გადაეცემა აჭარის ავტონომიური რესპუბლიკის უმაღლეს საბჭოს.